

增修萬縣志卷三十

士女志

宦績

武略

天下仕者之患莫如多欲後世翫法峻刑忍爲酷墨
至以身殉者豈智昏哉欲誤之也士莫不以仁廉望
其宰官自爲宰則忘之莫不以忠勇恤士責將兵者
自將則忘之果皆善忘者乎其亦有獨不忘者乎
明

陶文靖 省志人物載貴州省志萬縣人宣德間知

萬縣志

卷三十

士女志

宦績

一

普安州裁決庶務皆迎刃而解時稱能吏

鄧漢臣 舊省志萬縣人拔貢生萬曆十七年任無
錫縣令澹泊自甘百姓號爲鄧菜羹舊志澹泊自奉
而給衣棺以葬貧民後任鎮江通判年九十致仕歸
傅時望 蜀人物志號達吾萬曆戊戌進士知桂林
府惠政甚多桂人爲入祀名宦 舊省志字仲瞻隆
慶戊辰進士禦倭寇嫻方略舊志謙謙君子也家貧
室不容書案鑿石室太白巖之左堅苦讀書數年隆
慶間聯捷任桂林府禦倭寇嫻方略有遺愛卒於任

國朝

程訓 舊郡志萬縣舉人任武甯縣甫月餘會大旱聞離城三十里有石窩者靈泉一泓禱之輒應訓步行虔禱同僚俱云道路修阻未可以步往也訓正色斥之曰旱關民命予等憚徒步耶嗣後屢次虔祈仍不雨訓以憂民情切竟至憤懣以卒及殮懷中得片紙親書云久旱不雨予罪良深惟以命贖庶降甘霖次日大雨滂沱三日乃止

賴勳 字仲讓嘉慶己未成進士入詞館改授信豐

萬縣志

卷三十

士女志

宦績

二

知縣旋任吉水上饒陞定南同知歷署新城甯都州南安府居官三十年案無留牘屢決大獄同寮咸以老吏相推重而不矜才能惟以休養爲政民愛戴之
武略

漢

甘甯 郡志萬縣人三國時仕吳嘗說孫權先取黃祖鼓行而據武關可漸窺他郡權納其謀以爲折衝將軍輕財尚義勇冠三軍時號虎臣今邑有甘甯壩相傳甯生於此吳書本傳甘甯字興霸巴郡臨江人

也少有氣力好游俠招合輕薄少年爲之渠帥羣聚相隨挾持弓弩負旄帶鈴民間鈴聲卽知是甯人與相逢及屬城長吏接待隆厚者乃與交歡不爾卽放所將奪其資貨於長吏界中有所賊害作其發負至二十餘年止不攻劫頗讀諸子乃往依劉表因居南陽不見進用後轉托黃祖祖又以凡人畜之於是歸吳周瑜呂蒙皆共薦達孫權加異同於舊臣甯陳計曰今漢祚日微曹操彌憍終爲篡盜南荆之地山陵形便江川流通誠是國之西勢也甯已觀劉表慮旣

萬縣志

卷三十

士女志

宦績

武略

三

不遠兒子又劣非能承業傳基者也至尊當早規之不可後操圖之圖之之計宜先取黃祖祖今年老昏耄已甚財穀並乏左右欺弄務於貨利侵求吏士吏士心怨舟船戰具頓廢不修怠於耕農軍無法伍至尊今往其破可必一破祖軍鼓行而西西據楚關大勢彌廣卽可漸窺巴蜀權深納之張昭時在坐難曰吳下業業若軍果行恐必致亂甯謂昭曰國家以蕭何之任付君君居守而憂亂奚以希慕古人乎權舉酒屬甯曰興霸今年行討如此酒矣決以付卿卿但

當勉建方略令必克祖則卿之功何嫌張長史之言乎權遂西果禽祖盡獲其士眾遂授甯兵屯當口後隨周瑜拒破曹公於烏林攻曹仁於南郡未拔甯建計先徑進取夷陵往即得其城因入守之時手下有數百兵並所新得僅滿千人曹仁乃令五六千人圍甯甯受攻累日敵設高樓雨射城中士眾皆懼帷甯談笑自若遣使報瑜瑜用呂蒙計帥諸將解圍後隨魯肅鎮益陽距關公公號有三萬人自擇選銳士五千人投縣上流十餘里淺瀨云欲夜涉渡肅與諸將

萬縣志

卷三十

士女志

宦績

武略

四

議甯時有三百兵乃日可復以五百人益吾吾往對之保聞吾效唾不敢涉水涉水卽是吾禽肅便選千兵益甯甯乃夜往公聞之住不渡而結柴營今遂名此處爲關公瀨權嘉甯功拜西陵太守領陽新下雉兩縣後從攻皖爲升城督甯手持練身緣城爲吏士先卒破獲朱光計功呂蒙爲最甯次之拜折衝將軍後曹公出濡須甯爲前部督受勅出斫敵前營權特賜米酒眾殺甯以料賜手下百餘人食食畢甯先以銀盃酌酒自飲兩盃乃酌與其都督都督伏不肯時

持甯引白削置膝上呵謂之曰卿見□於至尊孰與甘甯甘甯尚不惜死卿何以獨惜死乎都督見甯色厲卽起拜持酒通酌兵各一銀盃至二更時銜枚出斫敵敵驚動遂退甯亦貴重增兵二千人甯雖麤猛好殺然開爽有計略輕財敬士能厚養健兒健兒亦樂爲用命建安二十年從攻合肥會疫疾軍旅皆已引出唯車下虎士千餘人並呂蒙蔣欽凌統及甯從權逍遙津北張遼覘望知之卽將步騎奄至甯引弓射敵與統等死戰甯厲聲問鼓吹何以不作壯氣毅

萬縣志

卷三十

士女志

宦績

武略

五

然權尤嘉之甯廚下兒曾有過走投呂蒙蒙恐甯殺之故不卽還後甯齋禮禮蒙母臨當與升堂乃出廚下兒還甯甯許不殺斯須還船縛置桑樹自挽弓射殺之畢勅船人更增舸纜解衣臥船中蒙大怒擊鼓會兵欲就船攻甯甯聞之故臥不起蒙母徒跣出諫蒙曰至尊待汝如骨肉屬汝以大事何有以私怨而欲攻殺甘甯甯死之日縱至尊不問汝是爲臣下非法蒙蒙至孝聞母言卽豁然意釋自至甯船笑呼之日興霸老母待卿食急上甯涕泣歔歔曰負卿與蒙

俱還見母歡宴竟曰甯卒權痛惜之子瓌
按三國志甘興霸巴郡臨江人考華陽國志臨江縣
接胸臆 一統志武甯廢縣漢臨江縣地武甯今隸
於萬郡志直書爲萬人固宜

五代

石處溫 九國志後蜀本傳萬州人本波斯之種仕
前蜀爲利州司馬同光中孟知祥入蜀補萬州管內
諸壇提點指揮使率義兵同收峽路時通州大將王
允瓊侵擾邊鄙及草寇杜景溫劫鄉豪殺縣令牟孟

萬縣志

卷三十

士女志

宦績

武略

六

剽略戶口焚燒村落處溫與諸將討平之知祥遺書
褒美轉甯將軍節度都知兵馬使萬州管內義軍都
指揮使孟昶襲位遷獎州刺史處溫初據石市招納
亡命遠近多歸之由是廣事耕墾積穀數萬千石前
後累獻軍糧二十餘萬石加之以寶貨昶嘉之加檢
校司空未幾授萬州刺史移簡州卒年八十

國朝

吳第選 舊志賦性耿直少有武略膂力過人効力
行間嫻習戎事順治中擢正白旗頭等下

譚詣 舊志字養元明末以禦流寇功累封仁壽侯
順治十六年東川一隅尙稱永歷年號詣勢不支赴
國朝川陝總督李國英轅前投誠
朝廷爵以向化侯復議開雲陽水師鎮授之繼裁水師
以侯爵歸第康熙七年復奉

召對隨授貴州安龍鎮秉節四年邊庭晏如壬子秋卒於鎮
歸葬故里其子天叙任花馬池副將

魏國珍 舊志字君錫順治初年蜀之西北雖入版
圖東南尙多遺孽珍與蜀將曾英余大海李占春禦

萬縣志

卷三十

士女志

宦績

武畧

七

寇於渝涪之間復隨李占春等歸誠

本朝累功任山西偏關參將子文藻雲南開化鎮守備

傅爾學 舊志字睿初任楚標中營副將先是甲申

流寇犯川爾學同蜀守將曾英李占春余大海等造
戰船千艘禦寇於渝江爲蜀東保障時東川蹂躪百
里無烟人且相食爾學放舟東下拯濟全活甚眾至
辛酉譚逆之變復帥水師隨大帥由楚道逆流蕩平
川東時萬民逃竄荒筭爾學遣人持檄密布招徠因
是鄉閭無恙

陳祚昌 舊志字列培當流寇姚黃入川勢甚猖獗
祚昌率土兵保護鄉里禦賊於南岸二十四堡中時
稱傑士

本朝定蜀祚昌率眾歸誠授楚督標左營遊擊隨大軍
平滇黔有功陞陝西提督中營參將

愚按康熙二十五年陳祚昌予蔭襲祚昌在湖廣辰
龍關殺賊八千餘名貴州恢復新添龍里二衛占奪
沙子哨恢復普安州雲南奪取重關太平橋走馬街
雲南城外殺賊九千餘名恢復雲南省城由空銜授
萬縣志 卷三十 士女志 宦績 武畧 八
為拖沙喇哈番准承廕襲註入四川越雋衛見 制
書

陳北學 舊志字思甫久歷行間康熙辛酉隨楚師
進勦川東有功陞太平營都司僉書

愚按舊志武功紀有吳譚魏傅陳諸人志藁佚之當
流寇蹂躪巴東百姓嬰鋒鏑肝腦塗地逃亡轉徙百
里無烟人且相食而譚魏禦流寇傅陳護鄉里其有
功於桑梓甚鉅及

聖人御字乾坤清夷歸命投誠鱗比翼附蓋亦一時之雄有

足多者雖譚詣拜爵兩朝然其節可議其功又曷可沒哉郡志人物載石處溫意與舊志將毋同茲仍從舊志采錄其傑出者毋令與碌碌庸輩同湮也

何裕如 邑庠生候選教諭字述堂素豪俠有智略勇於任事同治元年正月賊越梁山陷新甯裕如統帶大周里團勇扼大埡口兼制琉璃溝數隘逆酋藍大順不得入乃遶回梁鹽井溝入萬余邵二市時委辦團防副貢陳光熙集團練禦於新場裕如率勇疾馳至聲勢益振賊夜遁追勦數里知縣余居寬爲請

萬縣志

卷三十

士女志

宦績

武畧

九

防勦局檄委裕如防勦三月馬協鎮定國陣亡於紅谷藍逆二順直趨縣城未至十餘里而裕如率勇馳入城民心乃安遂約援軍三道出擊賊賊潰走開縣振旅而還郭逆過境裕如復由縣馳回追勦自大埡口雪虐風饕連月積勞成疾迨逆酋周紹湧竄萬已不能起邑令張琴就其家視疾猶強起畫策乃以所善尤炳璋代之卒擒王逆永順於開之張家寨下裕如死張琴爲詳請從優照軍營病故例議卹

余登鑑 邑監生以軍功保從九品同治元年正月

藍逆竄梁新西路喫緊登鑑慨然認守葛麻梁要隘
捐勇百名不領公帑賊陷新甯出窺萬登鑑擊殺其
打糧賊賊卒不敢過葛麻梁郭逆近萬鑑在縣城急
馳歸堵勦及周逆由開萬竄梁鑑降其僞統領眾數
千以連月積勞成疾卒

萬縣志

卷三十

士女志

宦績

武畧

十